

Dumonda Favre Accola concernent dapli protecziun per uffants e giuvenils cunter abus sexuals

Tenor il rapport da polizia 2018 èn vegnids elavurads en il Grischun 19 cuntravenziuns cunter l'art. 187 CP (acts sexuals cun uffants) e 78 delicts da pornografia (cuntravenziuns en il senn da l'art. 197 CP). Tar quest ultim cas sa tracti principalmain da pornografia cun uffants. Ils cas registrads èn s'augmentads en la cumparegliaziun a media vista (da 2015 – 2018 quasi ina duplicaziun). Er la societad svizra da pediatria ha annunzià in cler augment (+10 %) da cas registrads da maltractaments d'uffants. Las perscrutaziuns da las cifras inuffizialas dals onns passads supponan che per exempel mintga 7. fin 8. persuna haja subì violenza durant sia uffanza e giuventetgna en Germania. L'organisaziun mundiala da la sanadad (WHO) presuma che circa 18 milliuns persunas minorennas èn pertutgadas da violenza sexuala en Europa.

Sch'ins considerescha quests fatgs, dastgass la cifra inuffiziala esser bainquant pli auta che las cuntravenziuns registradas er en il Grischun. Ils pedosexuals sentenziads correspondentamain han – cun 50 – 80 % – ina recidiva fitg auta e cumpiglian 40 – 50 % dals delinquents sexuals.

Il barat cun la polizia criminala dal Grischun, cun il post da cussegliaziun per persunas violentas, cun la procura publica dal Grischun, cun l'agid a victimas, cun FORIO e cun ils mainascolas dal Grischun ha mussà ch'i vegn bain reconuschì in basegn d'agir preventiv, ma che nagin sa senta competent per quel.

Fin oz na posseda il chantun Grischun p.ex. nagin post da cussegliaziun per delinquents sexuals e per persunas cun disturbis pedofils, quai schebain che – tenor specialistas e specialists – i fiss efficazi ed avess effects preventivs da metter a disposiziun en tut il chantun posts spezialisads. Savend ch'ils pedosexuals èn delinquents per disa, fissi enorm impurtant da curar quests disturbis, gist per motivs da prevenziun sco er per proteger ils uffants. Actualmain dumondan 70 persunas pertutgadas tractaments dal post da cussegliaziun FORIO, dapi l'onn 2006 èn gia vegnids terminads 140 tractaments.

En sia resposta dals 11-05-2016 al postulat Natalie Rickli "Pedofilia, project da prevenziun 'Betg daventar in delinquent' en Svizra", ha la confederaziun renvià al fatg ch'ella sustegna financialmain purschidas correspondentas.

Sa basond sin questas infurmaziuns dumondan las sutsegnadras ed ils sutsegnaders la regenza:

1. È la regenza pronta d'elavurar prescripziuns e da relaschar talas per las scolas dal Grischun? Las prescripziuns duain prevair in proceder standardisà en connex cun recutar persunal (p.ex. pretender in extract dal register penal ed in extract specific per persunas privatas) sco er en connex cun violaziuns da cunfin en il context da scola.
2. È la regenza grischuna pronta da declerar per lianta e da finanzia ina campagna da prevenziun correspondententa en tut las scolas popularas dal Grischun, quai cun l'intent da rinforzar la persunalitad da l'uffant e da promover il scleriment sexual?
3. È la regenza pronta da surdar l'incumbensa d'elavurar e d'introducì in standard grischun simplifitgà per uniuns (da sport e da musica), che sa basa sin il material e sin ils concepts da Swiss olympic ch'èn gia avant maun?
4. È la regenza pronta d'examinar resp. da surdar ina incarica da prestaziun correspondententa a favur d'in post da cussegliaziun spezialisà per delinquents sexuals, per pedofils e per persunas pertutgadas en il Grischun?
5. È la regenza pronta d'examinar da lantschar campagnas da sensibilisaziun sco "Guardar empè da guardar davent" ubain "Betg daventar in delinquent", eventualmain er en coordinaziun cun auters posts da cussegliaziun e cun auters chantuns (p.ex. Prevenziun svizra da la criminalitad)?
6. Sustegna la regenza grischuna – en il barat cun ils cussegliers dals chantuns e cun ils cussegliers naziunals dal Grischun – in augment dals chastis per delicts cunter l'integritad sexuala (introducziun da chastis minimals) en il rom da l'armonisaziun currenta dal rom penal en il cudesch penal?

Puntraschigna, ils 14 da zercladur 2019

Favre Accola, Kasper, Gugelmann, Atanes, Berther, Berweger, Bettinaglio, Bigliel, Brandenburger, Buchli-Mannhart, Cantieni, Cavegn, Caviezel (Tavau Clavadel), Danuser, Della Cà, Deplazes (Rabius), Dürler, Ellemunter, Flütsch, Föhn, Gasser, Gort, Hardegger, Hartmann-Conrad, Hofmann, Hohl, Hug, Jochum, Kappeler, Kienz, Koch, Lamprecht, Locher Benguerel, Loepfe, Maissen, Märchy-Caduff, Müller (Susch), Natter, Niggli-Mathis (Grüsch), Noi-Togni, Papa, Perl, Preisig, Rettich, Ruckstuhl, Rüegg, Rutishauser, Salis, Sax, Schwärzel, Stiffler, Tanner, Thomann-Frank, Thür-Suter, Ulber, Valär, von Ballmoos, Weber, Wellig, Widmer (Favugn), Widmer-Spreiter (Cuira), Zanetti (Sent), Zanetti (Landquart), Renkel